

Мевлид-и Шериф

Сайгыылы мусульманлар!

Шимдики вакытта Къырымда ваһһабийлерге ярдым эткен инсанлар пейда олды. Олар бизим баба-деделеримизден къалган диний урф-адетлеримизни къабул этмейип, оларны ёкъ этмеге чалышалар. Бу инсанлар, олюлерге «Ясин» окъумакъ, дженазелерде «Сувсея» ве дуа мерасимлеримизде Мевлит окъумакъ ве бунъа бенъзеген диний адетлеримизге «ярамай бид'ат, яни динимизге келишмеген янъылыкъ» дейлер. Олар Пейгъамбер Эфендимизнинъ бид'атнен багълы ашагъыдаки Хадисни озюне коре ачыкълайлар. Пейгъамбер Эфендимиз буюрды ки:

كل بدعة ضلالة

Ваһһабийлер бу Хадисни бойле ачыкълайлар: «Бид'атларнынъ эписи – сапыкълыкъ, ярамайдыр». Лякин бу Хадиснинъ манасы – «Бид'атларнынъ чокъусы – ярамайдыр». Чюнки Имам Ан-Нававий «Сахих Муслимин» китабыны ачыкълагъанда деди: «Куллю» сёзю арапчада эки манада – «эписи» ве «чокъусы» маналарында къулланыла».

Бид'атларнынъ эписи ярамай олмагъаны ве бид'атлар эки къысымгъа айырылгъаныны Пейгъамбер Эфендимизнинъ шу Хадисинден анылашыла: «Ким Исламгъа яхшы бир бид'ат, яни янъылыкъ кирсетсе, онъа севап бардыр, эм де бу яхшы янъылыкъны девам эттирген инсанларнынъ севаплары киби севабы бардыр. Ве ким Исламгъа келишмеген бир янъылыкъ кирсетсе, онъа гунаһ бардыр, эм де динимизге келишмеген бу янъылыкъны девам эттирген инсанларнынъ гунаһлары киби гунаһы бардыр». Бу Хадисни Имам Муслим ривает эти.

Урьметли мусульманлар!

Яхшы бид'атлардан, яни динимизге кирсетилген янъылыкълардан бири – Мевлидир. Мевлит – бу Пейгъамбер Эфендимизнинъ догъулгъаныны къайд этмектир. Хиджреттен 7-нджи асырдан башлап кунюмизге къадар мусульманлар Мевлидни отъкезелер. Бутюн Ислам алимлери Мевлидни яхшы бир янъылыкъ, деп къабул эттилер. Шимдики вакытта Мевлиднен багълы бир чокъ янъыш фикирлер пейда олды. Мисаль, ваһһабийлер Мевлидни христианларнынъ Иса Пейгъамбернинъ догъулгъаныны къайд этмелерине бенъзетелер. Лякин Пейгъамбер Эфендимизнинъ Мевлид-и Шерифини къайд этмек, христианларнынъ Иса Пейгъамбернинъ догъулгъаныны къайд этмелерине бенъзетме дегильдир. Мевлид-и Шерифини къайд этмек – бу хайыр ишлеринден биридир. Аллаһу Те'алья Къур'ан-и Керимде буюрды: (وَافْعَلُوا الْخَيْرَ)

Манасы: «Хайыр япынъыз».

Мевлидни къайд эткенде, окъулган Къур'ан сурелери, япылган зикир ве кетирген саяватлар, ашатылган ашлар, даркъатылган садакъалар хайыр иш дегильми? Бу япкъан ишлеримиз харам олмаса, насыл да Мевлид харам оладжакъ?

Имам Муслим ривает эткенине коре, сахабелер Пейгъамбер Эфендимизден базарэртеси куню ораза тутмакънынъ манасы акъкъында сорагъанда, О деди: «Шу куню мен догъдым». Яни Аллаһу Те'алья шу кунде Пейгъамберимизни дюньягъа рахмет оларакъ йибергени ичюн ораза тутмакъ – хайыр бир иш олгъаны анылашыла. Аллаһкъа шукюр этип, бу кунде ораза тутмакъ хайыр бир иш олгъаны киби, башкъа хайыр ишлерини де япмакъ мумкюндир. Бу хайыр ишлеринден бири – Мевлидир.

Шимди дуа мерасимлеринде окъугъанымыз Мевлид-и Шерифке козь ташлайыкъ ве онынъ ичинде олган базы бейитлерни ачыкълайыкъ.

Мисаль, бу бейитни алайыкъ:

**«Бирдир О, бирлигине шек ёкъдуруп
Герчи, янъыш сёйлеенлер чокъ дуруп»**

Яни: Аллаһ бирдир, ортагъы ёкътыр. Аллаһ Къур'ан-и Керимде Бакъара суресининъ 163-нджи аетинде буюрды: (وَإِلَهُكُمْ إِلَهٌ وَاحِدٌ)

Манасы: «Сизинъ Иляһнынъыз бирдир».

Бейитте «бирлигине шек ёкъдуруп» дегени – «Аллаһнынъ барлыгъында шубхе ёкътыр» демектир, чюнки Аллаһ «Ибраһим» суресининъ 10-нджи аетинде буюрды: (أَفِي اللَّهِ شَكٌّ)

Манасы: «Аллаһнынъ барлыгъында шубхе ёкътыр».

Бейитте: **«Герчи янъыш сёйлеенлер чокъ дуруп»** – деп, айтыла. Аллаһ Къур'ан-и Керимде, «Юсуф» суресининъ 103-нджи аетинде Пейгъамбер Эфендимизге бильдирди: «Сен инсанларнынъ мусульман олмасыны пек истесенъ де, инсанланынъ чокъусы – къафирлердир»

Башкъа бир бейитке кечейик:

**«Джумле алем ёкъ икен, О бар эди.
Ярадылмыштан Гъаний, Джеббар эди».**

Аллаһтан гъайры эр шейге «алем» айтылып. Джумле алем, яни бутюн яратыкълар ёкъ экенде, Аллаһ бар эди.

Аллаһу Те‘аля Къур’ан-и Керимде «Фатиҳа» суресининъ 1-нджи аетинде буюрды:
(الْحَمْدُ لِلَّهِ رَبِّ الْعَالَمِينَ)

Манасы: «Алемлернинъ Рабби олгъан Аллаһкъа хамд олсун».

Бейитте анъылгъан Аллаһнынъ исимлеринден бири Эль-Гъаний – «ич бир шейге мухтадж олмагъан» демектир. Аллаһнынъ Джеббар исми исе «Аллаһ бутюн яратыкъларынынъ ихтияджларыны берген» демектир.

Даа бир бейит:

**«Вар икен О, ёкъ эди инс-у мелек
Арш-у Ферш-у ай ве кунь ве нух фелек».**

Бу бейитнинъ манасы шойле:

«Вар икен О» – яни **«Аллаһ бар икен»**,

«ёкъ эди инс-у мелек» – яни **«инсан ве мелек ёкъ эди»**.

Инсанлар, джинлер, мелеклер ёкъ эди, Аллаһу Те‘аля оларны сонърадан яратты. Буны Пейгъамбер Эфендимизнинъ бир Хадиси тасдыкълай: «Аллаһ мелеклерни нурдан, джинлерни алевден ве инсан огълуны топракътан яратты». Бу Хадисни Имам Бухари ривает этти.

Бейитнинъ девамьнда: **«Арш-у Ферш-у»** – деп, айтыла.

Пейгъамбер Эфендимиз бир Хадисинде бильдиргенине коре, Арш – бу Дженнетнинъ таваны олып, Аллаһу Те‘аля яраткъан энъ буюк джисимдир. Бу Хадисни Имам Бухари ривает этти. Аллаһу Те‘аля Къур’анда, Тевбе суресининъ 129-ынды аетинде буюрды:

(وَهُوَ رَبُّ الْعَرْشِ الْعَظِيمِ)

Манасы: «Аллаһ – Аршнынъ Яратыджысыдыр».

Аршнынъ буюклиги акъкъында Пейгъамбер Эфендимиз шойле буюрды: «Курсининъ буюклиги ве еди кокнинъ буюклиги арасындаки фаркъ, чель ве чельге атылгъан юзюк арасында фаркъына бенъзер. Аршнынъ буюклиги ве Курсининъ буюклиги арасында фаркъ та чель ве чельге атылгъан юзюк арасында фаркъына бенъзер». Бу Хадисни Ибну Хиббан ривает этти.

Шимди Аршны дёрт буюк мелек ташый, Къыямет кунюнде исе оны секиз мелек ташыйджакъ.

Аллаһу Те‘аля Къур’ан-и Керимде «Эль-Хакъкъа» суресининъ 17-нджи аетинде буюрды: «Къыямет кунюнде Аршны секиз мелек ташыйджакъыр».

Пейгъамбер Эфендимиз бу мелеклерден бириси акъкъында бойле сёйледи: «Мелекнинъ къулакъ йымшакълыгы ве омузы арасында месафе къушнынъ сурьатнен энмеси иле 700 йылдыр».

Хазрети Али Аршнынъ яратылышынынъ хикметини бойле ачыкълады: «Аллаһ Аршны Къудретининъ буюклигини косътермек ичюн яратты, Озюне мекян (ер) этмек ичюн дегиль». Буны Эбу-Мансур Эль-Багдади «Эль-фаркъу бейнелъ- фиракъ» адлы китабында ривает этти.

Онынъ ичюн «الرَّحْمَنُ عَلَى الْعَرْشِ اسْتَوَى» аетинде кечкен «истива» сёзюни «отурмакъ» манасында анъламакъ олмаз, чюнки «отурмакъ» – инсанларнынъ, джинлернинъ, мелеклернинъ ве айванларнынъ сыфатыдыр. Бу аетте «истива» сёзюнинъ манасы: «Аллаһ ‘Аршны Дженнетнинъ, коклернинъ ве ерлернинъ устуне тюшмесинден къорчалады».

‘Арш – алемнинъ энъ устю олгъаны киби, Ферш те – алемнинъ энъ ашагъы къысмы. ‘Арш ве Ферш арасында Дженнет, Курси, еди кок, еди ер ве еди ернинъ астында Дженнет бардыр.

Аллаһу Те‘аля «Талякъ» суресининъ 12-нджи аетинде буюрды: «Еди кок ве еди ерни яраткъан – Аллаһтыр».

Бейитнинъ сонъунда **«ай ве кунь ве нух фелек»** – деп, айтыла.

«Нух» – фарсча бир сёз, «докъуз» демектир, «фелек» – бу кунеш, ай ве йылдызларнынъ долангъан ёлуна айтылып.

Яни, инсан, мелек, ‘Арш, Ферш, ай, кунь ве фелек ёкъ экенде, Аллаһ бар эди. ‘Арш ве Ферш яратылмаздан эвель Аллаһ ерсиз бар эди. Ай ве кунь, яни вакъыт олмаздан эвель Аллаһ вакъытсыз бар эди. Къыскъасы, бу бейитлерде Аллаһ ерсиз ве вакъытсыз бар олгъаны бильдириле.

Пейгъамбер Эфендимиз бир Хадис-и Шерифте буюрды:

كان الله ولم يكن شيء غيره

Манасы: «Аллаһ бар эди, башкъа бир шей ёкъ эди». Бу Хадисни Имам Бухари ривает этти.

Башкъа бир бейитни алайыкъ:

**«Сув иле бунларны О вар эйледи
Бирлигине джумле икърар эйледи».**

Бу бейитте Аллаһ эр шейни сувдан яраткъаныны бильдире. Аллаһу Те‘аля Къур’ан-и Керимде «Эль-Энбия» суресининъ 30-ынды аетинде буюра:

(وَجَعَلْنَا مِنَ الْمَاءِ كُلَّ شَيْءٍ حَيًّا)

Яни, «яратыкъларнынъ ильки сув ве эр шей сувдан яратылгъан».

Бейитнинъ сонъунда: «Бирлигине джумле икърар эйледи» – сёзлери бар. Бундан анълашыла ки, эр шей Аллаһнынъ бир олгъанына ве Онынъ Азаметине ишарет эте.

Бундан сонъ кельген бейитте шойле айтыла:

**«Бари не аджет къыламыз сёзю чокъ.
Бирдир Аллаһ, Ондан артыкъ Танъры ёкъ».**

Яни: «Чокъ сёйлемеге аджет ёкътыр. Аллаһ бирдир, Ондан гъайры иляһ ёкътыр».

Энди Мевлиднинъ «Мунаджаат» къысмына кечейик:

**«Я Иляһи, ол Мухаммед хакъкъы-чюн
Ол шефаат кян-ы Ахмед хакъкъы-чюн».**

Яни: «Я, Раббим, Мухаммед Пейгъамберимизнинъ хакъкъы ичюн, шефаатчы олгъан Ахмед хакъкъы ичюн». Ахмед – бу Пейгъамбер Эфендимизнинъ адларындан биридир».

**«Козю яшы хакъкъы-чюн ашыкъларын,
Багъры башы хакъкъы-чюн садыкъларын».**

Яни: «Суфилер, азизлернинъ янгъыз олгъанда Аллаһ къоркъусындан тёккен козь яшлары ичюн, коксюнде Аллаһ къоркъусы, башларыны седждеден котермеген, ниетинде догъру олгъанларнынъ хакъкъы ичюн».

**«Афв этип исьянымыз, къыл рахмети,
Ол Хабибинъ юзю сую урьмети».**

Яни: «Пейгъамбер Эфендимизнинъ урьмети ичюн, хата ве гунаһларымызны рахметинънен афв эт».

Корьгенимиз киби, баба-деделеримиз «Мунаджаатны» окъуп, Пейгъамбер Эфендимизнинъ урьмети ичюн Аллаһкъа дуа эте эдилер. Оларнынъ Пейгъамбер Эфендимизнинъ хакъкъы ичюн Аллаһкъа дуа эткенлери – Къур’ан аетлерине ве Пейгъамберимизнинъ Хадислерине зыт дегиль. Пейгъамбер Эфендимиз бир сокъур инсангъа шифа корьмеси ичюн бойле бир дуаны огретти: «Эй, Мухаммед, козюмнинъ шифаланмасы ичюн мен Сени Аллаһкъа весиле этем», яни «козюмнинъ шифасы ичюн Сени себепчи этем». Буны Эт-Табарани «Эль-Му‘джам» китабында ривает этти ве Хадис сахих олгъаныны тасдыкълады.

Аллаһ бизни догъру ёлдан айырмасын ве «баба-деделеримизнинъ ёлу догъру дегиль» – деп, айткъан фитнеджилернинъ шерринден сакъласын!

Сайгъылы мусульманлар!

Аллаһу Те‘аля Къур’ан-и Керимде буюрды: (إِنَّمَا الْمُؤْمِنُونَ إِخْوَةٌ)

Манасы: «Мусульманлар къардашлардыр».

Ве Пейгъамбер Эфендимиз бир Хадис-и шерифинде буюрды: «Къыямет кунюнде, Аршнынъ кольгесинден гъайры башкъа кольге олмагъан вакъытта, бири-бирини Аллаһ ризасы ичюн севген мусульманлар Аршнынъ кольгесинде оладжакълар».

Къыямет кунюнде кунеш инсанлардан бир километрге якъын узакълыкъта оладжакъ, амма бири-бирини Аллаһ ризасы ичюн севген мусульманлар кунешнинъ сыджагъындан азап чекмейджеклер. Бири-бирини алдатмагъан, бири-бирине догъру ёл косътерген, бири-биринен къатнашкъан, аз да олса (мисаль, теспи киби) бири-бирини бахшышнен къувандыргъан мусульманлар Аршнынъ кольгесинде оладжакълар.

Аллаһ ризасы ичюн Динимизни, Пейгъамбер Эфендимизнинъ, сахабелернинъ ве олардан сонъ кельгенлернинъ инанч-акъидесини яймагъа ярдымды олгъан мусульманлар Къыяметте зорлукъ чекмейджеклер.

Эждатларымыздан, баба-деделеримизден къалгъан эһл-и суннет инанчыны бозмагъа чалышкъан ве урьф-адетлеримизни таптап ёкъ этмеге тырышкъан инсанларгъа къаршы биз

яшларымызгъа догъру инанчыны огретип, оларны етиштирмек керекмиз. Бу – бизим бойнумызнынъ борджудыр.

Яшларымызгъа, балаларымызгъа инанчымызнынъ догърулыгъыны Къур'ан, Хадис ве мантыкъ ёлунен исбатлап огретмек керекмиз. Иште, тек бу бильгилернен яшларымыз янълыш фиркъа ве акъымларгъа къаршы чыкъа биледжеклер.

Шимдики вакъытта Къырымда ваhхабийлерге ярдым эткен инсанлар пейда олды.. Ваhхабийлернинъ башы – Мухаммед Абдульваhхаб – илим къокъусыны биле алмагъан, Ислам динини бозмакъ ичюн ингилизлер тарафындан етиштирилген инсандыр. О 250 сене эвель Арабистанда, Неджд больгесинде Динимизге ве дёрт мезхепке къаршы олгъан янълыш фикирлерни яймагъа башлады. О, озь янълыш фикирлерине коре укюмлер чыкъарып, эзандан сонъ Пейгъамберимизге саяватлар кетирген сокъур къартны ольдюрмеге эмир этти. Ваhхабийлернинъ фикирине коре, эзандан сонъ Пейгъамберимизге сеснен саяватлар кетирген инсан – къфир экен. Яни, биз намаздан сонъ, Мевлитте ве дуаларымызда сеснен саяват кетиргенимиз, яни «Эссаляту вассалюму алейке, я Расулюллаh, эссаляту вассалюму алейке, я Хабибаллаh, эссаляту вассалюму алейке, я сейидиль эввелине вель ахирин ве салли ‘аля джеми’иль энбия-иль вель мурсалин вельхамдулилляхи раббийль ‘алемин» айткъанымыз оларгъа коре ширк, куфюр, имандан чыкъмакътыр. Амма бу бус-бутюн янълыш фикир, чюнки Пейгъамбер Эфендимиз бир Хадис-и шерифинде буюрды: «Ким муэдзинни эшитсе, онынъ айткъаныны текрарласын; эзан биткен сонъ, манъа салят кетирсин».

Кене де ваhхабийлернинъ янълыш фикирлеринден бири – Пейгъамберлернинъ ве эвлияларнынъ къабирлерини зиярет этмек, оларгъа коре, Аллаhкъа ортакъ къошмакътыр. Шунинъ ичюн олар Мекке ве Медине шеэрлеринде бинълердже сахабелернинъ къабирлерини ернен бир тегизлеп ташлагъанлар. Амма Пейгъамбер Эфендимиз буюргъан эди: «Меним къабримни зиярет эткен, шефаатиме наиль олур». Бу Хадисни Ад-Дар Кутний ривает этти ве Аль-Хафиз Ас-Субкий тасдыкълады.

Ваhхабийлернинъ айткъанына коре, олюлеримизге Къур'ан-и Керимден «Эль-Фатиха», «Ясин» ве башкъа суре ве аетлерини окъумакъ – харам. Оларгъа коре, бизим япкъанымыз «Къур'ан Хатым» ве эткен дуа мерасимлеримиз харам ола экен. Амма Пейгъамбер Эфендимиз буюрды: «Олюлеринизге «Ясин» суресини окъунъыз». Бу Хадис ваhхабийлернинъ фикирини янълыш олгъаныны косътере.

Ве оларнынъ энъ буюк янълышы шунда ки, ваhхабийлер айталар: «Аллаh Аль-Аршнынъ устюнде отура». Бу айткъанлары Къур'ангъа къаршы келир, «**لَيْسَ كَمِثْلِهِ شَيْءٌ**», яни «Аллаh ич бир шейге бенъземез» аетине къаршы келир; ве Хадиске де къаршы келир, чюнки Пейгъамбер Эфендимиз деди: «Аллаh бар эди, башкъа бир шей ёкъ эди». Бу Хадисни Имам Бухари ривает этти. Оларнынъ айткъанлары мантыкъкъа да къаршы келир, чюнки Аллаh Аршны ве бутюн ерлерни яратмаздан эвель, Аршсыз ве ерсиз бар эди. Буларны яраткъан сонъ да Аллаh денъишмез, О кене мекянсыз бардыр.

Урьметли мусульманлар!

Эгер сиз бойле янълыш фикирлерде олгъан инсанларгъа расткельсенъиз, билинъиз ки, бу – ваhхабийлердир ве олардан сакът олунъыз. Башкъа диндашларымызны да олардан сакъындырынъыз, чюнки олар озь янълыш фикирлернен сизлерни динден чыкъармагъа чалышырлар. Оларгъа алданманъыз. Балаларынъызгъа ве торунларынъызгъа да ваhхабийлернинъ янълышларны анълатынъыз.

Аллаh бизлерни эр тюрлю янълыш фиркъалардан сакъласын!

✉ Украина, г. Киев, ул. Лукьяновская, 46;
☎ (044) 4651877; 4651878, Факс: (044) 4561770
E-mail: islam@i.kiev.ua, Web site: www.islamyat.org